



宛陵先生文集目錄卷第二十四

郭之美忽過

讀蟠桃詩寄子美

孫司諫知鄧州

史尉還烏程

薛宅觀鵬狐圖

寄汶上

蕭著作宰豐城

董簿之信州鉛山

弟得臣簽判越州

李舍人淮南提刑

吳殿丞代州通判

和人喜雨

胥尉之復州景陵

李審言歸鄭州

李舍人見過

春鶻謠

來夢

送淮南李提刑

次道往鄭拜墓

孫太祝亳州簽判

寄靈隱通教僧

李少傅佚老亭

令狐秘丞守彭州

和李舍人寒食

和張應之見贈

哭尹子漸

次道約浴

陳經秘校之信幕

朱太博常州倅

師古邀賦

和中道寶相花

擬陶體手問足

足蒼手

目釋

贈葉山人

李廷臣通判蔡州

朱櫻

悼子

懷悲

和中道雨樹

荅永叔寄示

黃敏復尉新城

寄永叔

丞相二章

閔讒狡二章

薛八殿丞有遺

師厚來奠其姑

諭烏

弔裴易進士

閑詠呈次道

寄楚州呂濟叔

荅中道小疾見寄

五月五日

送可教僧歸越

和裴如晦雨中

雨中宿三君書堂

和中道雨中見寄

目錄終

宛陵先生文集卷第二十四

郭之美忽過云往河北謁歐陽永叔沈子山
春風無行迹似與草木期高低新萌芽閉戶我未
知忽聞人扣門手把蟠桃枝問我此蟠桃緣何結
子遲但笑不復答問者當自推振衣向河朔河朔
人偉竒以茲不荅意遲子北歸時

讀蟠桃詩寄子美永叔

韓孟於文詞兩雄力相當偶以怪自戲作詩驚有
唐篇章綴談笑雷電擊幽荒衆鳥誰敢和鳴鳳呼
其凰孟窮苦纍纍韓富浩穰穰窮者啄其精富者

爛文章發生一爲宮擊斂一爲商二律雖不同合
奏乃鏘鏘天之產竒怪希世不可常寂寥二百年
至寶埋無光郊死不爲島聖俞發其藏患世愈不
出孤吟夜號霜霜寒入毛骨清響哀愈長玉山未
難熟終歲苦飢腸我不能飽之更欲不自量引吭
和其音力盡猶勉強嗟我於韓徒足未及其牆而
子得孟骨英靈空北邙誠知非所敵但欲繼前芳
近者蟠桃詩有傳來北方發我衰病思藹如得春
陽欣然便欲和洗硯坐中堂筆墨不能下悅悅若
有亡老雞背爪硬未易犯其場不戰輒自却雖奔

未甘降更欲呼子美子美隔濤江其人雖憔悴其
志獨昂昂氣力誠尚對勝敗可交相安得二子接
揮鋒兩交銛我亦願助勇鼓旗謀其旁快哉天子
樂一醕宜百觴乖離難會合此志何由償

孫司諫知鄧州

甫

南陽漢名都其俗尚敦樸亡徒頃爲盜刺史安與
角田野遂焦熬蒿萊思沃濯茲雖得甘露向已苦
風雹更張固所重下令未宜數且觀道傍碑文字
今已剝

史尉還烏程

宏

與君去年別君來竟悲喜乘馬夜訪君備陳昔行
李五月辭吳中六月渡楊子七月行喪妻是月子
又死買棺無橐金助貸賴知己嬌兒晝夜啼幼女
飲食止行路况炎蒸悲哀滿心耳青銅不忍照焦
悴鄰於鬼八月至都下少長疾未已一婢復嗑然
老媪幾不起君門日預朝僕乘貧可恥十月補王
畿受代隔歲紀閉門陋巷中悶默閱書史初聞君
至之如見湖山羨今聞君復還爲我謝雲水故交
儻相問懷抱今如此豈乏南飛鴈豈無東下鯉自
同嵇康懶作書愁把紙

薛九宅觀鵬狐圖

蜀中處士李懷衮手畫皂鵬擒赤狐猛爪入頰觜
迸血短尾獨俛窮蹄鋪鵬爭怒力狐爭死二物形
意無纖殊一禽一獸固已別硬羽軟毛非筆模入
君此室見此圖如在原野從馳驅

寄汶上

大第未嘗身一至人猜巧宦我應非彈冠不讀先
賢傳說劒休更短後衣瘦馬青袍三十載故人朱
轂幾多違功名富貴無能取亂石清泉自憶歸

蕭著作宰豐城

王都二月花正開社雨作陰迎鷺子人先春色向
江南江南春色歸春水拍岸綠波生荻芽晨羞聊
可助甘旨縣涂爲政子所諳不敢贈言言且鄙

董安負外之信州鈇山簿

古岸綠蒲老春帆逆水輕烹鮮聊以笔泝險復蕪
程可用茲時樂無將遠道驚曾爲江上客因贈北
行人

弟得臣殿丞簽判越州

前爲山陰宰

再爲會稽行聊問會稽羨禹穴遷所探秦望斯所
紀年深已浸深書碑必亡矣剡溪有樵風其事恐

非是買臣千載後得無負薪子黃庭昔換鵝道士
儻不死行當訪其真願以鷺報爾慎勿笑我癡萬
事難可擬摘筭復盈檐緡魚新出水此又食之珍
因書悉條理

李舍人淮南提刑

啄木欲除蠹蠹去樹亦撓何須食微蟲爾腹豈不
飽天下本無事自爲庸人攪君實知古深終慙用
傾巧

吳殿丞代州通判

舉才不避勢必也知其長王官誠濟濟豈得佐邊

疆代郡實雄要昔已選帥良功名乃欲取叱馭登
太行

和人喜雨

仲冬至仲春陰隔久不雨耕農將失時萌穎未出
土帝心實焦勞日夜不安處禱祠煩駿奔肝饗香
無補帝時降金輿徧款靈真宇百姓知帝勤變愁
爲鼓舞和氣能致祥是日雲蔽午夕風不鳴條甘
潤忽周普已見堯爲君安問誰爲輔

胥員外之復州景陵尉

城隅漢水闊正足槎頭鱖采荇蕪登俎施眾不貴

錢江帆風勢羨竹屋雨聲連必有蒼苔碣留爲好
事傳

李審言歸鄭州

嘗從京索間躍馬望春山氣象歸王國丘陵接漢
關長榆啼鳥亂細草牧陂閑老獸行涂路因歌送
子還

李舍人見過

春泥無處所窮巷少人行忽枉青絲騎曾非白面
生笑言聊與適雞黍未嘗烹莫歎余貧甚吾儕業
本清

春鶻謠

春巢纍纍衆鳥哺兒衆鳥不出巢群雛嗷嗷腹甚
飢不出巢其謂何上有蒼鶻窺其窠問鶻何仇鶻
不我顧我巢有雛開口待哺一日不擊巢雛不食
爾憂爾雛衆鳥號呼又可吁

來夢

忽來夢我于水之左不語而坐忽來夢余于山之
隅不語而居水果水乎不見其逝山果山乎不見
其途爾果爾乎不見其徂覺而無物泣涕漣如是
歟非歟

汴之水三章送淮南提刑李舍人

汴之水分于河黃流濁濁激春波昨日初觀水東
下千人走喜兮萬人歌歌謂何大舩來兮小舩過
百貨將集玉都那君則揚舩兮以紂刑科汴之水
入于泗黃流清淮爲一致上牽下櫓日夜來千人
同濟兮萬人利利何謂國之漕商之貨實所寄我
送行舟于水之次春風吹兩旗君作天王使畧客
自求魚清江莫相避

宋次道一百五日往鄭拜墓

去不避春雨泣望松栢門颯然風悲響如感泉下

魂沃酹向墳土空濕陳草根人歸夜月冷石馬在
九原

孫太祝亳州簽判

微風起船尾雨氣生日脚不愁春路泥正泛春波
樂順去疾鳥飛問程殊我度才名留守家更入尚
書幙

寄靈隱通教僧

竒山若洗青草木生石上根萌不可窮條蔓自增
王其陰有高僧日食惟一盞世人久已疎猿鳥應
相向

李少傅鄭圃佚老亭

莊生述天理老固當念佚舉世用自勞誰能以爲
必我公謝鼎司嗣子都華秩代言輟帝右作藩輔
王室承顏向茲地園宇樂永日佳樹發已繁脩竹
移未密春禽時弄吭清景付吟筆朱金待金構榮
美安與匹

令狐秘丞守彭州

挺

前時草草別渺漫二十年從宦各所適非爲道路
偏今始一相遇言愧少壯前子有萬里翮尚不飛
雲煙而復走隴蜀欲以條教宣將西過危棧葉暗

聞杜鵑未知爲郡樂預已抱愁煎再來與子辭當
去復留連且念前期遠歲月實易遷

依韻和李舍人旅中寒食感事

一百五日風雨急斜飄細濕春郊衣梨花半殘意
思少客子漸老尋游非戢戢車徒九門盛寥寥煙
火萬家微今朝甘自居窮巷無限堵間得醉歸

依韻和張應之見贈

京洛多游好相與歲月深雖同執一籥吹曲各異
音自微衆音響安感萬物心我窮子來唁慷慨發
長吟

哭尹子漸

其弟師魯守潞

故人河內守昨日報已亡同氣泣上黨悲風生太
行曩爲衆所惜今復人共傷阮籍本真牽感槩壽
不長

次道約食後同敏叔中道平叔如晦詣景

德浴以風埃遂止

昔思春服成浴乎沂水上仲尼亦所志語此雖未
向子今當是時有意同我尚已邀二三友欲往期
畢餉倏然風滿途塵土阻清曠安得一振衣徒希
舞雩唱

陳經秘校之信州幙

東吳海物錯南楚江味多家吳而宦彼風土去幾
何既得風土樂可贊政治和歸來識香草爲綴楚
人歌

朱武太博通判常州兼寄胡武平

昔我陽夏公嘗茲同郡治政餘作東園草木尚有
意豈不務安養斯民歌樂易是時有賢才鄉舉堪
皇器今方居家廬試質當時事願君思前人文雅
庶未墜

師厚云蟲古未有詩邀予賦之

貧衣弊易垢易垢少虱難群處裳帶中旅升裘領
端藏跡詎可索食血以自安人世猶俯仰爾生何
足觀

依韻和中道寶相花

嘉卉得所託植君之寢陽開榮同此春淡艷自生
光不爲露益色不爲風盡香節換葉已密尚可見
餘芳

擬陶體三首手問足

共生一體中出處常相并所動輒有跡何不擇地
行履鳥雖可蔽步武豈無聲嘗思汝爲玉請削見

直誠

足荅手

上下各有分同質實異支要用固爾先當念扶我
危我刑爾獨安何以幸華夷且願縮袖間操執自
有時

目釋

我居元首間分並日月光左右各照耀盲一豈相
妨尚恐有所醫獨見不能強嗟爾手與足何爲欲
競傷捉馳自有職勿使心悲涼

贈葉山人

傾珍奉賓客傲物去珥貂貴來不以屈飲酒且道
遙黃金百鎰盡左右無纖腰但存丹砂術有道在
一瓢

李廷臣通判蔡州

夾路青青草隨君去未休亦將離思遠還共翠心
抽細藉車輪穩薰牽野蔓柔玉孫歸不久冉冉莫
經秋

朱櫻

明珠摘木末紅露貯金盤始見侍臣賜已爲黃雀
殘味兼羊酪美食馱楚梅酸苑園東周盛累累暎

葉丹

悼子小名十十

舟行次符離我子死阿十臨之但驚迷至傷反無
泣歎定始懷念內若湯火集前時喪爾毋追恨尚
無及邇來朝哭妻淚落襟袖濕又復夜哭子痛併
肝腸入吾將仰問天此理豈所執我惟兩男子奪
一何太急春鳥獨蔓延哺巢首戢戢

懷悲

自爾歸我家未嘗厭貧窶夜縫每至子朝飯輒過
午十日九食盡一日儻有脯東西十八年相與同

甘苦本期百歲恩豈料一夕去尚念臨終時拊我
不能語此身今雖存竟當共爲土

和中道雨樹

一旬苟不雨萬木昏蒼蒼朝見洗林葉動搖生輝
光晚逢開踈陰枝上漏微陽翠色固以好安得無
秋霜

永叔寄詩八首并祭子漸文一首因采八
詩之意警以爲答

昔聞退之與東野相與結交賤微時孟不改貧韓
漸貴二人情契都不移韓無驕矜孟無醜直以道

義爲已知我今與子亦似此子亦不愧前人爲北
都健兒昨日至扣門乃得所遺詩上言病中初有
寄下言我詠蟠桃枝盛衰開落感殘杏暮春無事
羨游絲班班鳩鳴忽懷念一掃十幅無閑辭洛川
花圖多品目闕新爭巧始可疑讀書又憶石夫子
似蠶作蠶誠有之鎮陽歸夢北潭北吟此八章誰
謂癡最後有文弔尹子壽夭難問信所悲共書大
軸許傳玩一日百展曾忘疲報君亦欲齎滿軸恐
費紙墨令人嗤

黃敏復尉新城

新城接桐廬山茗久所利江東亡命兒販不畏黥
削堂上千金子捕以操凶器恐非吾徒爲勇少乃
可避

寄永叔

夏日永以靜渴鳥方在枝張口不能言翕翕兩翅
披庭中有井泉井深無綆縻欲汲假其鄰鄰且非
我知鴻鷗矯河上比爾得所宜得宜豈不樂胡然
我念之

丞相二章

丞相之拜冠弁旅至乘馬載驅如彼鉅渚有鴈有

鷺有龜有魚丞然來萃翔沫嘯呼
丞相之去乃還印綬乃飭車輪如彼涸津時靡翔
羽時靡游鱗寂兮寂兮豈有嘉賓

閔讒佞二章

矯有讒佞以戕類佞以媚其貴謂不騫不墜謂
人莫爾制而死制之誰謂無鬼孰制之死彼佞之
將死若有以見既見既惡之引袂蒙面謂人莫爾
辨而自辨之誰謂無鬼孰俾之謹

薛八殿丞有遺

未嘗營貨貨具寧為來俸苦月不足貧死口肯

開好事忽我恤十千助晨杯薪水已過豐不得如
顏回

師厚與胥氏婦來奠其姑

雙裾來此室慟哭拜靈床魂衣想髮髻薄酒湛其
觴含悽拊孤稚拭淚問平常我生都無如仰看燕
在梁

諭烏

百鳥共戴鳳惟欲鳳德昌願鳳得其輔咨爾孰可
當百鳥告爾問惟烏最靈長乃呼烏與鵲將政庶
鳥康烏時來佐鳳署置且非良咸用所附已欲同

助翱翔以鷺代鴻鴈傳書識暄涼鸚鵡代鸚鵡刺
舌說語詳禿鶴代老鶴乘軒事昂藏野鷄代雄鷄
爪莆稱檀場雀豹代鷓鴣搏擊肅秋霜蝙蝠嘗入
幙捕蚊夜何忙老鴟啄臭腐盤飛使游揚鶴鷗與
梟鳩待以爲非常一朝百鳥獸詭鳥出遠方烏伎
亦止此不敢戀鳳傍養子頗似父又貪噪豺狼爲
烏鳥不伏獸肯爲爾戕莫如且斂翮休用苦不量
吉凶豈自了人事亦交相

弔裴易進士

力學未及仕口中已含珠賦命固所負讀書非所

辜斂送有兄弟哭泣無妻孥惟此靡薄厚必竟同
一途

閑詠寄呈次道

我閑日貧縛子閑數疾纏閑固不可常吾觀與子
然吾與子嗜學豈獨閑窮年安安者誰歟分亦似
所偏

寄楚州呂濟叔

亭午鳥不下誰復過我廬忽聞扣門者偶出問何
如云是山陽吏太守遣置書自惟久窮困游子安
念予淮陰況要津賓館無暫虛豈意有所逮委曲

情未踈報言愧不覲聊以謝興居

荅中道小疾見寄

嵇康性彌懶曾不廢養生子姑當妙年何乃勞其
精老耽有至論身孰親於名詩本道情性不須大
厥聲方聞理平淡昏曉在淵明寢欲來於夢食欲
來於羹淵明儻有靈爲子氣不平其人實傲佚不
喜子纏縈吾今敢告子幸願少適情時能與子飲
莫惜倒鉸罌

五月五日

屈氏已沉死楚人哀不容何嘗奈詭謗徒欲却蛟

龍未泯生前恨而追沒後蹤沅湘碧潭水應自照
千峰

送可教僧歸越

萬事馱尋常羨慕每不足居南多北思在遠慙近
俗旣來橘變枳但見空條綠氣味誰復論孤根逗
品曲

和裴如晦雨中過其亡兄易居

人亡雨館寂車馬偶來臨濕衣添新淚故物傷夙
心淒淒庭下樹萬葉起哀音此地嘗對語在昔豈
知今

雨中宿謝胥裴三君書堂

急雨射窓鳴燈殘我正寢穴蚓聲苦長流響入孤
枕衆醉如不聞強聒亦已甚夜短竟無寢困矐劇
塵礮

和中道雨中見寄

雨淫上復落雲暗不少開泥將沒馬脰思子日幾
迴我旣不可往子亦不可來屋漏又苦甚巾舄生
莓苔安肯問農畝唯憂無酒材但能置醇酎莫負
吾樽壘

宛陵先生文集卷第二十四

宛陵先生文集目錄卷第二十五

送謝寺丞及第

苦熱

和廷老三
月十四日

劉薛二君過予

荅宗說遺冰

劉殿丞通判建州

和中道伏日

和蔡仲謀苦熱

儼上人粹隱堂

送鄭都監瀛州

送刁安豐

劉八飲將散

贈張處士

將行與仲謀

荅裴送序意

和應之晚景

送楊秘丞入蜀

乙酉六月二十日

聞永叔喪女

寄謝開封薛宰

草木

夢登河漢

寄宋次道中道

日蝕

寄王江州

薛九請賦山水字詩

七夕有感

過開封古城

通判桃花廳許州起慶曆五年秋六年夏

任廷評歸京

和通判雞冠花

秋夜感懷

和通判招翫月

蚯蚓

秋風

韓寺丞通判鄧州

韓欽聖問西洛牡丹

夢感

秋鴈

和通判有寄

曹承制知永康軍

三鳥

龍箕

目錄終

宛陵先生文集卷第二十五

送謝寺丞新賜及第赴扶溝宰

世所重登科如君特才選麗賦驚宗工妙譽動京
輦行鷁路非遐雙旗風欲展聊閱民版餘應不負
墳典

和李廷老三月十四日

三月日幾望士游溱水陽溱流已渙渙有美此朝
翔偶來適此願月色同滿床士曰陟少室女曰歸
大梁及晨各異役悲喜竟回腸芍藥有遺風贈好
期不忘固匪子能逮是焉繼新章

苦熱

赤日若射火林風不動梢羸汗尚流沛冠服豈堪
包貴人諒有稟慣習非強教竊觀行車馬空蕩劇
煨炮寧思山中人石泉浸兩腋

劉薛二君過予遇雨

猛雨迫好鳥止我屋室隅是時有劉薛亦既此焉
俱我厩秣爾馬我厨飯爾奴二人乃可語因觀爾
馬圖古筆得神妙俗工非所模收圖雨且止鳥飛
當駕驅

荅廷評宗說遺冰

仲夏遘餘閏屋室如炊蒸孰云窮處者言贈太官
冰時靡有暘死實亦賴友朋定能涼一席既已却
青蠅吾心久自信飲已不以矜

劉牧殿丞通判建州

平生交游少海內寡與期識君且恨晚一見已將
離人言何嗟別會此非舊知昔曰匪我舊亦既接
音詞譬彼空林鳥止息偶同枝忽有振翮去尚爾
鳴聲悲我今臨流送安顧俗所爲

和中道伏日次韻

伏日每苦熱古來亡事侵嘗聞東方朔割肉趨庭

陰百戰當早罷將畏赫日臨我無歸遺人懷念空
霑襟

和蔡仲謀苦熱

大熱曝萬物萬物不可逃燥者欲出火液者欲流
膏飛鳥獸其羽走獸獸其毛人亦畏絺綌況乃服
冠袍廣廈雖云託呼風不動毫未知林泉間何以
異我曹蠅蚊更晝夜膚體困爬搔四序苟迭代會
有秋氣高

儼上人粹隱堂

十年不出戶世事皆剗鋤時無車馬游焚香坐讀

書有堂曰粹隱惟見安且舒心遠迹非遠歲月速
輪輿寓目暫爲實過者卽爲虛譬若開是室終日
於此居欲問昨日事已覺今日踈明朝却視今復
與前何如聊悟此中樂猶觀濠上魚

送鄭太保瀛州都監

秋氣入關河匈奴久已和琯弓聊可試寶劍不須
磨草木將搖落牛羊自寢訛能知塞垣景持以贈
吾歌

送刁安豐

嘗游芍陂上頗見楚人爲水有鳥魚羨土多薑芋

宜寧無董生孝將奉叔教祠舊令乃吾友寄聲於此時

劉八飲將散分得非休沐不得會閏五月晦日

君非休沐時茲會豈能得我無官局縈幸爾預歡適莫辭衝雨歸歸時烏帽側

贈張處士

聞爾閑於琴寢處未嘗輟抱之京城來豈與工師列一奏流水聲落指鳴泱泱既曰林壑人安事塵土轍

將行與蔡仲謀飲分席上果得桃

曾無千歲人安見千歲實聊效昔所授瓊瑤報非

答裴送序意

我欲之許子有贈爲我爲學勿所偏誠知子心苦愛我欲我文字無不全居常見我足吟詠乃以述作爲不然始曰子知今則否固亦未能無諭焉我於詩言豈徒爾因事激風成小篇辭雖淺陋頗尅苦未到二雅未忍捐安取唐季二三子區區物象磨窮年苦古著書豈無意貧希祿廩塵俗牽書辭辯說多碌碌吾敢虛語同後先唯當稍稍緝銘誌願以直法書諸賢恐子未諭我此意把筆慨嘆臨

長川

和張士曹應之晚景

遠空雲解駁南陌雨初收
獨鳥去煙外斜陽明樹頭
涼飈虛枕席漲滂起汀洲
會有從軍役將離更暮愁

送楊浩秘丞入蜀

有才不得試志亦無所干
有母不得養法當之遠官
雖曰在民政孝心寧得安
志願且未遂而趨蜀道難
行思叱馭者勿復苦長歎

乙酉六月二十一日予應辟許昌京師內外

之親則有刁氏昆弟蔡氏子予之二季友
人則胥平叔宋中道裴如晦各携肴酒送
我于王氏之園盡懽而去明日予作詩以
寄焉

性僻交游寡所從天下才今朝誰出祖親戚持樽
罍晚節相知人唯有胥宋裴所欠謝夫子歸穰尚
未迴岸傍逢名園繫舟共徘徊嘉蓮如笑迎照水
呈丹頤南庭蒲萄架萬乳纍將礎群卉競瑣細紫
紅相低偎尋常固邂逅孰辨落與開酒闌各分散
白日將西頽城隅遂有隔北首望吹臺

開封古城阻淺聞永叔喪女

去年我喪子與妻君聞我悲嘗俛眉今年我聞若
喪女野岸孤坐還增思思君平昔憐此女戲弄膝
下無不宜昨來稍長應惠黠想能學母粉黛施幾
多恩愛付涕淚洒作秋雨隨風吹風吹北來露我
袂哀樂相恤唯已知自古壽夭不可詰天高杳杳
誰主之以道爲任自可遣目前況有寧馨兒

寄謝開封宰薛贊善

予生多不偶事事相與背適從平川役乃遇河決
潰舟膠在中野寸步使心痲誰知赤縣尹勤恤每

外內文符飭亭長寇盜虞鼠輩仍能饋餅餌童稚
仰所賚今又置酒壺惠問亦已再令我清夜飲是
夕值月晦獨酌効謫仙而復無影對如何亡情游
似亦有世態家人誠可同況我昨喪配雖曰預朝
裾左右無粉黛兀然唯書史舊學馱瑣碎欲探文
字工下筆語多礙却思君西齋新治虛可愛燕坐
禽鳥寂吟哦簿書退此樂吾未如區區勞覆載

草木

草木無處所動搖知風形今日萬葉黃昨日萬葉
青青旣漸衰變黃亦漸凋零人生恃歲月種栢滿

郊垆

夢登河漢 六月二十九日

夜夢上河漢星辰布其傍位次稍能辯羅列爭光
芒自箕歷牛女與斗直相當既悟到上天百事應
可詳其中有神官張目如電光玄衣乘蒼虬身珮
水玉璫丘蛇與穹鼈盤結爲紀綱我心恐且怪再
拜忽禍殃臣實居下土不意涉此方既得接威靈
敢問固不量有牛豈不力何憚使服箱有女豈不
工何憚縫衣裳有斗豈不柄何憚挹酒漿卷舌不
得言安用施穹蒼何彼東方箕有惡務簸揚唯識

此五者願言無我忘神官呼我前告我無不臧上
天非汝知何苦詰其常豈惜盡告汝於汝恐不祥
至如人間疑汝敢問於王扣頭謝神官臣言大爲
狂駭汗忽爾覺殘燈熒空堂

寄宋次道中道

再來魏闕下舊友無一人或爲美官去或爲泉下
塵晚歲相知者操節許松筠日世常山公伯仲文
學均與我數還往以義爲比隣屢假篋中書校證
多護真次述盈百卷補亡如繼秦中作淵明詩平
淡可擬倫于時多驕佚黃卷罕所親昨以興西師

往往劍射伸短衣誇走馬睥目語常賸欲効西山
勇遂笑東魯仁捨本趨富貴乃與市賈濱以此較
於子素業固未泯前日之許昌別君已經旬偶然
值河決窮坐如涸鱗臨風思有寄夜詠還達晨

日蝕

赫赫初出咸池中浴光洗跡生天東不覺有物來
晦昧團團一片如頑銅前時蝦蟇食爾妃天下戢
戢無有忠責罵四方誰膽大仰頭憤憤唯盧仝欲
持寸刃去其害氣力雖有天難通是時了無毫芒
益徒有文字辯且雄仝死于今百餘載日月幾度

遭遮蒙有人見之如不見誰肯開口浴天公老鴉
居處已自穩三足鼎峙何乘情而今有嘴不能噪
而今有爪不能攻任看怪物瞽天眼方且省事保
爾躬日月與物固無惡應由此鳥招禍凶吾意髣
髴料此鳥定亦閃避離日宮安逢后羿不乖暴直
與審愨彎弓強弓射此賈怨鳥以謝毒惡蟲二曜各
安次災害無由逢南不尤赤鳥東不誚蒼龍北龜
勿吐氣西虎勿嘯風五行不汨陳虞舜生重瞳我
今作此詩可與仝比功

寄王江州

休嗟謫官去山根勝窮邊當職言無隱他時事好
還何常聞埃火唯是對爐煙潮到盆城否猶期信
可傳

薛九公期請賦山水字詩

薛君堂懸山水字請我試作山水詩呼童磨墨慰
君意強作安得有好辭昔年曾是杜陵客東城水
上橫此碑字方數尺形勢健豈似取次筆畫爲東
城父老語於我推本朔自開元時不知當時何所
用費功饒刻爲瓌竒我去長安十載後此石誰輦
來京師苑中構殿激流水暮春脩禊浮酒卮是時

祠臣出不意酒半使賦或氣發百斜鳴蹕不可駐
未就引去如鞭笞脫我幸得預此列玉階立寫從
然莫今雖下筆不稱意已書滿幅令君嗤

七夕有感

去年此夕肝腸絕歲月淒涼百事非一逝九泉無
處問又看牛女渡河歸

過開封古城

荒城臨殘日雞犬三四家豈復古阡陌但問新桑
麻頽垣下多穴所窟狐與蛇漢兵墮銅鏃青血爲
土花

通判桃花廳

自此詩許州起慶曆五年秋盡六年夏

種桃西庭下有意延東風東風與雨至
深出枝上紅花底有小鳥其字曰桃蟲
既於桃得名爲桃言女工翦羅作舞衣
奉君歡莫窮舉杯無愧者避世武陵翁

任廷平歸京并序

廷平任君往者登進士科入許幙後二年予被太原公辟與君爲代君之嚴君以太子少保致仕西都西都去許其道有三北趨鄭過函谷而至洛陽其途而遠西趨汝由關塞而河南其途小艱然邇

於北道西北趨登封歷轅而至洛師其途險惡不與二道比君之歸也捨二道之平易踐西北之險惡何哉是非急於拜慶耶豈特與人情異歟噫人以爲險在君爲易由出於天誠乎爲難也出天誠易險道可謂孝也平及其行予故作詩以送之言之少室西定陟輟轅險歸心不避危夕枕屢成魘秋聲故苑空野氣荒陵掩獨念京洛塵曾將客衣染

和通判太博雞冠花十韻

神農記百卉五色異甘酸乃有秋花實全如雞幘

丹籠煙何聳聳法露更團團取譬可無意得名殊
足觀逼真歸造化任巧即彫剗赤玉書留魏丹砂
句誦韓魏文帝與鍾繇求玉珉書論玉云赤如誠能因物比誰
謂一時難有客驅辭頴臨風運筆端嘗嗟古吟缺
每惜此芳殘揣情苦精妙繼音慙未安

秋夜感懷

風葉相追逐庭響如人行獨宿不成寐起坐心屏
營哀哉齊體人魂氣今何征曾不苦墮籜繞樹猶
有聲涕淚不能止月落雞號鳴

依韻和通判八月十五夜招翫月二章

尋常圓魄豈不好競愛今宵分外明明極只知無
隔礙誰言桂樹向中生
一年一見最堪惜百歲百夕能幾多縱有明年似
今夕明年同會復如何

蚯蚓

蚯蚓在泥穴出縮常似盈龍蟠亦以蟠龍鳴亦以
鳴自謂與龍比恨不頭角生螻蝻似相助草根無
停聲聒亂我不寐每夕但欲明天地且容畜憎惡
唯人情

秋風

秋風不饒物斗至聲已惡青林葉尚繁雖好將恐
落人意誠愛惜節候肯相若白髮無再玄盛衰茲
可度

韓宗彥寺丞通判鄧州

往歲陪祠泰壇下始一相見如相知我今入幙君
有待喜得款語勝前時便嗟陳事日侵汨雖欲數
面曾無期忽聞兵吏已迎候馬有行色車將脂賀
君有意事清簡太守亦鄙尋常爲騏驥步驟豈局
促鳳皇羽翼多威儀漢家近親不復有召父舊聞
於今墮墮由狂者生利害曾未略究民間宜祇言

引水幸圭賦矯請罷毀功何施千載厚惠一日去
至今農畝空嗟咨夫子才高識且遠勿畏勢力重
扶持他年人作去思頌願以大字書長碑

韓欽聖問西洛牡丹之感

韓君問我洛陽花爭新較舊無窮已今年誇好方
絕倫明年更好還相比君疑造化特着意果乃區
區可羞恥嘗聞都邑有勝意既不鍾人必鍾此由
是其中立品名紅紫葉繁矜色美萌芽始見長高
萊氣焰旋看墜桃李乃知得地偶增異遂出群葩
號奇偉亦如廣陵多芍藥閭井荒殘無可齒淮山

邃秀付草樹不產髦英產佳卉人於天地亦一物
固與萬類同生死天意無私任自然損益推遷寧
有彼彼盛此衰皆一時豈關覆壽爲偏委呼兒持
紙書此說爲我緘之報韓子

夢感

生哀百十載死苦千萬春何爲千萬春厚地不復
晨我非忘情者夢故不夢新宛若昔之日言語尋
常親及寤動悲腸痛逆如刮鱗

秋鴈

秋鴈多夜飛前群後孤來儔合鳴自得隻去音已

哀哀音能感人腸酸非食梅共將形影對安得不
早衰

依韻和通判把菊有寄

湖邊草樹多壽蠹葉已少色唯菊不畏霜淡艷如有
德自與蘭並生非因人所植愛貴曾未厭秋日短
苦逼朋好各相望採持空嘆息臨杯不能飲對案
不能食借問君何憂節物感人極

曹承制知永康軍脩

鐵驄黃金羈年少蜀城守蜀城臨古江正在離岸
口離岸李涼鑿其利實不久旣避沫水害又以漑

田畝大此百民宜遺祠奉牲酒行當謹厥事無乃
為政首

三鳥

翩翩三奇鳥各擇松桂宜二鳥同所向並立高高
枝一鳥依別樹屈比二鳥卑嗟嗟天下鳥莫與三
鳥期三鳥鳴少和蒿間多鷲斯頻頻徒爾黨三鳥
安可欺

龍箕一首 并序

在昔賢人良輔之生也或山之神靈和氣之鄰或
星之晷曜晶明之所鍾故詩有萑萑之作稱厥甫

申傳說騎箕之說又得之前古公之誕日考之星
歷月次于箕宜與說同也夫登翊王室為宋鉅臣
豈徒然歟謹依雅頌作龍箕一章十八句以獻

龍箕在天莫不孕靈我公生之既生既德曾誰與京
爰弼帝右繼序其榮之贊我太平萬事其成之殿
我輔邦庶民其寧之政靡薄厚百職其揚之真言
顯光永錫年后王迺祝眉壽迺獻兕觥福祿其將之

宛陵先生文集卷第二十五

This image shows a high-contrast, black and white representation of a table or grid. The table is rectangular and features a thick, dark border. Inside the border, there are 10 vertical columns of varying widths, separated by thin lines. The columns are mostly empty, but there are some faint, illegible markings or characters on the right side, particularly near the top and bottom of the table.

